



遼志

說選十七偏記

本末

契丹之始也中國簡冊有所不載遠夷草
昧復無書可考其年代不可得而詳也本
其風物地有二水曰地也里沒里復名陶
猥思沒里者是其一也其源出自中京西
馬盂山東北流華言所謂土河是也曰梟
羅箇沒里復名女古沒里者又其一也源

出饒州西南平地松林直東流華言所謂
潢河是也至木葉山合流爲一古昔相傳
有男子乘白馬浮土河而下復有一婦人
乘小車駕灰色之牛浮潢河而下遇於木
葉山顧合流之水與爲夫婦此其始祖也
是生八子各居分地號八部落一曰祖皆
利部二曰乙室語部三曰實活部四曰納
尾部五曰顛沒部六曰內會雞部七曰某

解部八曰奚盟部立遺像于木葉山後人
祭之必刑白馬殺灰牛用其始來之物也
後有一主號曰廼呵此主特一髑髏在穹
廬中覆之以氊人不得見國有大事則殺
白馬灰牛以祭始變人形出視事已卽入
穹廬復爲髑髏因國人竊視之失其所在
復有一主號曰啗呵戴野猪頭披野猪皮
居穹廬中有事則出退復隱入穹廬如故

後因其妻竊其猪皮遂失其夫莫知所如
次復又一主畫里昏呵惟養羊二十口日
食十九畱其一焉次日復有二十口如之
是三主者皆有能治國之名餘無足稱焉
異矣哉氊中枯骨化形治事戴猪首服豕
皮罔測所終當其隱入穹廬之時不知其
孰爲之主也孰爲之副貳也荒唐恠誕訛
以傳訛遂爲口實其詳亦不可得而詰也

自時厥後牛馬死損詞訟龐淹復遭風雨
雪霜之害中遂衰微八部大人後復稍整
兵三年一會於各部內選雄勇有謀畧者
立之爲主舊主退位例以爲常至阿保機
爲衆所立後併七部而滅之契丹始立其
國大原興自阿保機至耶律德光而浸盛
遭五季之衰天未厭亂石晉胎釁產禍諸
華毒痛四海飛揚跋扈貪殘僭擬中國帝

王名數盡盜有之冠履倒植薰蕕共染干
戈之慘極矣迨宋真宗屈已和戎不復以
一矢相加含容覆護百有餘年聖興道三
主以來天誘其衷革心慕義貪婪歲幣顧
惜盟好銷鋒寢柝號稱無事南北皆不知
兵各保首領以沒茲非以德懷遠之明效
與祖宗列聖之德可謂至哉若遼之威服
諸夷奄有全燕何其強也天祚昏孱女真

啓心深入一呼土崩瓦解何其弱也且兵
者不祥之器也天道好還盛極而微理固
然也故其興也勃焉其亡也忽焉悲夫今
撫舊聞哀其本末雖未能考其異而訂其
同要之大畧其不相遠後之英主忠臣志
欲溯今洄古可以爲鑒矣

族姓原始

契丹都部族本無姓氏惟各以所居地名

呼之婚嫁不拘地里至阿保機變家爲國
之後始以王族號爲橫帳仍以所居之地
名曰世里著姓世里者上京東二百里地
名也復賜后族姓曰蕭氏番法王族惟與
后族通婚更不限以尊卑其王族后族二
部落之家若不奉北主之命皆不得與諸
部族之人通婚或諸部族私相婚嫁不拘
此限故北番惟耶律蕭氏二姓也

國土風俗

契丹國在庫莫奚東唐所謂黑水靺鞨者
今其地也有七十二部落不相統制好爲
寇盜父母死而悲哭者以爲不旺但以其
屍置于山樹上經三年後方取其骨而焚
之因酌酒而祝曰冬月時面陽食我若射
獵時使我多得豕鹿其無禮頑囂於諸夷
最甚其風俗與奚靺鞨頗同至阿保機稍

并服諸小國而多用漢人漢人又教之以
隸書半增損之作文字數千以代刻木之
約又制婚嫁置官號稱皇帝

部落

漢時爲匈奴所破保鮮卑山魏青龍中部
酋爲王雄所殺衆遂逃橫水之南黃龍之
北至元魏自號曰契丹在唐開元天寶間
使朝獻者無慮二十故事以范陽節度爲

押奚契丹使至唐末契丹始盛

併今部落

初契丹有八部族之大者曰大賀氏後分
爲八部部之長號大人而常推一人爲王
建旗鼓以統八部每三年則以次相代或
其部有災疾而畜養衰耗則八部聚議以
旗鼓立其次而代之被代者以爲元約如
此不敢爭及阿保機乃曰中國之王無代

主者由是阿保機益以威制諸國不肯代
其立九年諸部共責誚之阿保機不得已
傳其旗鼓而謂諸部曰吾立九年所得漢
人多矣吾乃別自立一部以爲漢城可乎
諸部許之漢城在炭山東灤河上有鹽鐵
之利乃後魏滑鹽縣是也其地可植五穀
阿保機率漢人耕種爲治城郭邑屋廛市
如幽州制漢人安之不復思歸阿保機知

衆可用用其妻述律策使人告諸部大人
曰我有鹽鐵之利諸部所食然諸部知食
鹽之利而不知其鹽有主人可乎當來犒
我諸部以爲然共以牛酒會鹽池阿保機
伏兵其旁俟其酒酣伏兵發盡殺諸部大
人復併爲一國東北諸夷皆畏服之

兵馬制度

晉末契丹主部下兵謂之大帳有皮室兵

約三萬騎人皆精甲兵也爲其爪牙國母
述律氏部下謂之屬坳有衆二萬是先戎
主阿保機牙將半已老矣每南來時量分
借五千騎述律氏常留數百兵爲部落根
本其諸大會領太子偉王永康南北王子
趙麻答五押等大者千餘騎次者數百人
皆私甲也別族則有奚霫勝兵亦千餘人
少馬多又有渤海酋領大舍利高模漢兵

步騎萬餘人並髡髮左衽竊爲契丹之飾
復有近界韃靼于厥里室韋女真党項亦
被脅屬每部不過千餘騎其三部落吐渾
以陁陌幽州管內鴈門以北千餘軍州部
落兵合三五萬餘衆此是石晉割賂契丹
之地番漢諸族其數可見矣每契丹南侵
其衆不啻十萬國主入界之時步騎車帳
不從阡陌東行一槩而行大帳前及東西

面差大首領三人各率萬騎支散游變百
十里內外相覘邏謂之欄子馬戎主吹角
爲號衆則頓舍環遶穹廬以近及遠折木
稍屈之爲弓子輔不設槍營塹柵之備每
行軍聽鼓三伐不問昏晝一布便來行逢
大敵不乘戰馬俟近敵師卽競乘之所以
新羈戰馬蹄有餘力其用軍之術成列而
不戰俟退而乘之多伏兵斷糧道隨冒夜

舉火上風曳柴積餉自齎退敗無耻散而
復聚寒而益堅此其所長也

建官制度

賤他姓貴耶律蕭氏二姓其官有契丹樞
密院及行官都總管司謂之北面以其在
牙帳之北以主番事又有漢人樞密院中
書省行官都總管司謂之南面以其在牙
帳之南以主漢事其陽隱宗正寺也夷离

畢參知政事也林牙翰林學士也夷裔中
刺史也內外官多做中國者其下佐吏則
有敝史本古思奴古都奴古徒奴古分領
兵馬則有統軍侍衛控鶴司南王北王奚
王府王帳分提失哥東西都省太師兵又
有國舅幹轄膳遙輦裳袞諸司南北皮室
二十部族節度頻必里九克漢人渤海女
真五節制五治火帥一百六百九百家矣

凡民年十五以上五十以下皆籍爲兵時
舉兵必殺灰牛白馬祠天地及木葉山神
鑄金魚符調發兵馬其從馬及傳命有銀
牌二百軍所舍有遠探欄子馬以夜聽人
馬之聲每其立衆所得人戶馬牛金帛及
其下所獻牲口或犯罪沒入者別爲行官
領之建州縣置官屬旣死則設大穹廬鑄
金爲像朔望節辰忌日輒致祭築臺高丈

餘以盆焚食謂之燒飯

宮室制度

十宮各有門戶出兵馬阿保機曰洪義宮
德光曰永興宮兀欲曰積慶宮述律曰延
昌宮明記曰章敏宮突欲曰長寧宮燕燕
曰崇德宮隆緒曰興聖宮隆慶曰敦睦宮
隆運曰文忠宮王府又有四樓在上京者
曰西樓木葉山曰南樓謂化州曰東樓唐

州曰北樓凡受冊積柴升其上大會番夷
其下已乃燔柴告天而漢人不得預有譚
子部百人夜以五十人番直四鼓將盡歌
於帳前號曰聒帳每謁木葉山卽射柳枝
譚子唱番歌前導彈胡琴和之已事而罷
衣服制度

國母與番官胡服國主與漢官卽漢服番
官戴氍冠上以金華爲飾或以珠玉翠毛

蓋漢魏時遼人步搖冠之遺像也額後重金花織成夾帶中貯髮一總服紫窄冠帶以黃紅色條裏革爲之用金玉水晶碧石綴飾又有冠如紗帽無簷不撤雙馬額前綴金花上結紫帶末綴朱或紫阜幅巾紫窄袍束帶丈夫或綠中單綠花窄袍中單多紅綠色貴者被貂裘以紫黑色爲貴青色爲次又有銀鼠尤潔白賤者被貂毛羊

鼠沙狐裘弓以皮爲弦箭削楪爲斡韎勒輕快便于馳走以貂鼠或鵝頂鴨頭爲捍腰宋真宗景德中太常博士王曙戶部員外郎李維往賀國主生辰還言國主見漢使疆服衣冠纔已卽帳中雜番騎出郊射獵矣

漁獵時候

每歲正月上旬出行射獵凡六十日然後

竝撻魯河鑿冰釣魚水畔卽縱鷹鷂以捕
鵝鴈夏居炭山或上京避暑七月上旬復
入射鹿夜半令獵人吹角倣鹿鳴鹿旣集
而射之宋真宗時遣使往賀生辰還言始
至長泊泊多野鵝鴨國主射獵領帳下騎
擊扁鼓遶泊驚鵝鴨飛起乃縱海東青擊
之或親射焉國主皆佩金玉錐號殺鵝宰
鴨錐初獲卽拔毛插之以鼓爲坐遂縱飲

酒醉以此爲樂又好以銅及石爲槌以擊
兔每秋則衣氊裘呼鹿射之夏月以布爲
氊帳籍毯圍棊雙陸或深澗洗鷹

試士科制

太祖龍興朔漠之區倥偬干戈未有科目
數世後承平日久始有開闢制限以三歲
有鄉村省三試之設鄉中曰鄉薦府中曰
府解省中曰及第時有秀才未願赴者州

縣必報刷遺之程文分兩科曰詩賦曰經義魁各名分焉三歲一試進士貢院以二寸紙書及第者姓名給之號喜帖明日舉按而出作樂及門擊鼓十二面以法雷震殿試臨期取旨又將第一人特贈一官授奉直大夫翰林應制奉文字第二人第三人止授從事郎餘竝授從事郎聖宗時止以詞賦法律取士詞賦爲正科法律爲雜

科若夫任子之令不論文武竝奏蔭亦有員數

歲時雜記

正旦

正月一日國主以糯米飯白羊髓相和爲團如拳大於逐帳內各散四十九箇候五更三點國主等各於本帳內牕中擲米團在帳外如得雙數當夜動番樂飲宴如得

雙數更不作樂便令師巫十二人外邊遶
帳撼鈴執箭唱叫於帳內諸火爐內爆鹽
并燒地拍鼠謂之驚鬼崇帳人第七日方
出乃解襪之法北呼此謂之姝担離漢人
譯云姝是丁担離是日

立春

立春日婦人進新春書以黃繒爲幟刻龍
像銜之或爲蝦蟆

人日

人日京都人食煎餅於庭中俗云薰天未
知何所從出也

中和

二月一日大族姓蕭者竝請耶律姓者於
本家筵席此節爲瞎里肘漢人譯云瞎里
是請肘是時

上巳

言選集 卷之三
三月三日國人以木雕爲兔分兩朋走馬射之先中者勝其負朋下馬跪奉勝朋人酒勝朋於馬上接盃飲之北呼此節爲淘裏化漢人譯云淘裏是兔化是射

佛誕日

四月八日京府及諸州縣各用木雕悉達太子一尊城上昇行放僧尼道士庶民行城一日爲樂

端午

五月五日午時採艾葉與綿相和絮衣七事國主著之番漢臣僚各賜艾衣三事國主及臣僚飲宴渤海厨子進艾糕各點大黃湯下北呼此時爲討賽離又以雜絲或綠結合歡索纏于臂膊婦人進長命縷宛轉皆爲人象帶之

朝節

夏至日婦人進扇及脂粉囊謂之朝節

三伏

六月十八日大族耶律姓竝請蕭姓者亦名瞎里忒

中元

七月十三日夜國主離行宮向西三十里卓帳先于彼處造酒食至十四日一應隨從諸軍竝隨部落動番樂設宴至暮國主

却歸行宮謂之迎節十五日動漢樂大宴十六日早却往西方令隨行軍兵人大噉三聲謂之迎節此節謂賽離拾漢人譯云賽離是月拾是好是月好也

中秋

八月八日國主殺白犬於寢帳前七步埋其頭露其嘴後七日移寢帳於埋狗頭上北呼此節為担褐孛漢人譯云担褐是狗

嬾是頭

重九

九月九日國主打團斗射虎少者輸重九一筵席射罷於地高處卓帳與番漢臣登高飲菊花酒出兔肝切以生鹿舌拌食之北呼此節爲必里遲離漢人譯之云九月九日也又以茱萸研酒灑門戶間辟惡亦有入鹽少許而飲之者又云男摘二九粒

女摘一九粒以酒噴者大能辟惡也

小春

十月內五京進紙造小衣甲并鎗刀器械各一萬副十五日一時進塚國主與押番臣密望木葉山奠酒拜用番字書狀一紙同焚燒奏木葉山神云寄庫北呼此時爲戴辨漢人譯云戴是燒辨是甲

冬至

冬至日國人殺白馬白羊白鴈各取其生
血和酒國主北望拜黑山奠祭山神言契
丹死魂爲黑山神所管又彼人傳云凡死
人悉屬此山神所管富民亦然契丹黑山
如中國之岱嶽云北人死魂皆歸此山每
歲五京進人馬紙甲各萬餘事祭山而焚
之其禮甚嚴非祭不敢近山

臘月

臘月國主帶月戎裝應番漢臣諸司使已
上竝戎裝五更三點坐朝動樂飲酒罷各
等第賜御甲羊馬北呼此節爲抄離時漢
人譯云抄離是戰時是時是戰時也

詔盜

五月十三日放國人作賊三日如盜及十
貫以上依法行遣北呼爲鶻里時漢人譯
云鶻里是偷時是時也

行軍

契丹行軍不擇日用艾和馬糞於白羊毳
毳骨上灸灸破便出行不破卽不出

午日

契丹出軍每遇午日起程如不用兵亦須
望西大喊三聲行之彼言午是北朝大王
之日

旋風

契丹人見旋風合眼用鞭望空打四十九
下口中道坤不刻七聲

舍利

契丹國內富豪民要裹頭巾者納牛駝十
頭馬百疋并給契丹名目謂之舍利

跪拜

凡男女拜皆同其一足跪一足著地以手
動爲節數止於三四彼言捏骨地者卽跪

也

長白山

長白山在冷山東南千餘里蓋白衣觀音所居其山內禽獸皆白人不敢入恐穢其間以致蛇虺之害黑水發源于此舊云粟末河太宗破晉改為混同江其俗剝木為舟長可八尺形如梭子曰梭船上施一槳止以捕魚至渡車則方舟或三舟

澤蒲

西樓有蒲瀕水叢生一葉如柳長不盈尋丈用以作箭不矯作而堅左氏所謂董澤之蒲是也

回鶻豆

回鶻豆高二尺許直榦有葉無旁枝角長二寸每角止兩豆一根才六七角色黃味如粟

螃蟹

渤海螃蟹紅色大如碗螯巨而厚其脆如
中國蟹螯巖舉鮑魚之屬皆有之

葉隆禮撰

遼志終

金志

初興本末

說選十一

八偏記

金國本名朱里真蕃語舌音訛為女真或
曰慮真避契丹興宗名又曰女直肅慎氏
遺種渤海之別族也或曰三韓辰之役挈
氏於此地中最微且賤唐貞觀中靺鞨來
中國始聞女真之名世居混同江之東長
白山下其山乃鴨綠水源南鄰高麗北接

室韋西界渤海鐵離東瀕海三國志所謂
抱婁元魏所謂句吉唐所謂黑水靺鞨者
今其地也其屬分六部有黑水部卽今女
真其水掬之則色微黑契丹目爲混同江
深二十丈餘狹處可六七十步闊者至百
步居江之南者謂之熟女真以其服屬契
丹也江之北者謂之生女真亦臣服于契
丹後有酋豪受宣命爲首領號太師契丹

自賓州混同江北八十里建寨以守又云
契丹乘唐衰併吞諸蕃三古六女真在其
中契丹恐女真爲患誘豪右數千家處之
遼陽之南而著籍焉分其勢使不得與本
國通謂之合蘇欵自咸州東北分界入宮
口主東沫江中間所居之女真咸隸兵馬
司與其國往來無禁謂之回霸抵凌而野
居者謂之黃頭女真又居東沫江之北寧

州江之東地方千餘里人戶十餘萬無大君長亦無國名止是族帳散居山谷間自推豪傑爲酋長小者千戶大者數千戶蓋七十二部落之一也僻處契丹東北隅臣屬一百餘年世襲節度使兄弟相傳週而復始或又云其初酋長本新羅人號完顏氏完顏猶漢言王也女真妻之以女生二子其長卽胡來也其自此傳三人以至阿

骨打以其國產金及有金水源故稱爲大金

初興風土

女真在契丹東北隅地饒裕山林田宜麻穀土產人參蜜蠟北珠生金細布松實白附子禽有鷹鷄海東青之類獸多牛馬麋鹿野狗白兔青鼠貂鼠其人勇悍好詐貪婪殘忍善騎射喜耕種好漁獵每見野獸

之蹤躡而求之能得其潛藏之所又以樺
皮爲角吹作啾啾之聲呼麋鹿而射之其
居多依山谷聯木爲柵或覆以板與梓皮
如墻壁亦以木爲之冬極寒屋纔高數尺
獨開東南一扉扉旣掩復以草綢繆塞之
穿土爲床煨火其下而寢食起居其上厚
毛爲衣非入室不撒衣衣屨稍薄則墮指
裂膚雖盛夏如中華初冬俗勇悍喜戰鬥

耐饑渴苦辛騎上下崖壁如飛濟江河不
用舟楫浮馬而渡其樂惟鼓笛其歌惟鷓
鴒曲第高下長短如鷓鴒聲而已其疾病
無醫藥尚巫覡病者殺猪狗以禳之或用
車載病者入深山大谷以避之其親友死
則以刀割額血淚交下謂之送血淚死者
埋之而無棺槨貴者生焚所寵奴婢所乘
鞍馬以殉之其祭祀飲食之物盡焚之謂

言選集
之燒飯其道路無旅店行者息于民家主
人初則拒之拒之不去方具飯食而納之
其市無錢以物博易無工匠其舍屋車帳
往往自能爲之其禮則拱手退身爲喏跪
左膝蹲右膝拱手搖肘爲拜其節序元旦
則拜日相慶重午則射柳祭天稅賦無常
隨用度多寡而歛之與契丹言語不通而
無文字賦歛科發射箭爲號事急者三射

之多以牛驢負物遇雨則張牛革以禦之
緩則射獵急則戰鬪宗室皆謂之郎君事
無大小皆屬焉

男女冠服

金俗好衣白櫟髮垂肩與契丹異垂金鑲
雷顛後髮繫以色絲富人用珠金飾婦人
辮髮盤髻亦無冠自滅遼侵宋漸有文飾
婦人或裹逍遙或裹頭巾隨其所好至于

衣服尚如舊俗土產無桑蠶惟多織布貴賤以布之麤細爲別又以化外不毛之地非皮不可禦寒所以無貧富皆服之富人春夏多以紵絲錦衲爲衫裳亦間用細皮布秋冬以貂鼠青鼠狐貉或羔皮或作紵絲紬絹貧者春夏並用爲衫裳秋冬亦衣牛馬猪羊猫犬魚蛇之皮或獐鹿麋皮爲袴爲衫袴襪皆以皮至婦人衣曰大襖子

不領如男子道服裳曰錦裙裙去左右各闕二尺許以鐵條爲圈裹以繡帛上以單裙襲之

婚姻

金人舊俗多指腹爲婚姻旣長雖貴賤殊隔亦不可渝婿納幣皆先期拜門戚屬偕行以酒饌往少者十餘車多者至十倍飲客佳酒則以金銀器貯之其次以瓦器列

於前以百數賓退則分餉焉先以烏金銀
杯酌飲貧者以木酒三行進大軟脂小軟
脂如中國寒具以進蜜糕人各一盤曰茶
食宴罷富者淪建茗畱上客數人啜之或
以麤者煎乳酪婦家無大小皆坐炕上婿
黨羅拜其下謂之男下女禮畢婿牽馬百
匹少者十匹陳其前婦翁選子姓之別馬
者視之好則畱不好則退畱者不過十二

三或皆不中選雖婿所乘亦以充數大抵
以畱馬少為耻女家亦視其數而厚薄之
一馬則報衣一襲婿皆親迎既成婿畱于
婦家執僕隸役雖行酒進食皆躬親之三
年然後以婦歸則婦氏用奴婢數十戶牛
馬數十群每群九牯一牡以資遣之夫謂
妻為隆隆妻謂夫為愛根一云婚家富者
以牛馬為幣貧者以女年及笄行歌于途

其歌也乃自叙家世婦工容色以伸求侶
之意聽者有求娶欲納之卽攜而歸後復
方補其禮偕來女家以告父母父死則妻
其母兄死則妻其嫂叔伯死則姪亦如之
無論貴賤人有數妻

飲食

飲食甚鄙陋以豆爲漿又嗜半生米飯漬
以生狗血及蒜之屬和而食之嗜酒好殺

釀麩爲酒醉則縛之俟其醒不爾殺人

阜隸

阜隸出身與蔭人等甚以爲重如州郡都
吏出職竝補將仕郎授錄事判官司徒司
判寺丞至儒林亦蔭子部吏缺人令州縣
擇人貢之十年無公私過補昭信校尉授
下縣令或錄事漸爾亦可至知州同州

浮圖

浮圖之教雖貴戚望族多舍男女爲僧尼
惟禪多而律少在京曰國師師府曰僧錄
僧正列郡曰都綱縣曰維那披剃威儀與
南宋等所賜號曰大師曰大德並賜紫所
謂國師在京之老尊宿也威儀如王者國
主有時而拜服真紅袈裟升堂問話講經
與南朝等僧錄僧正師府僧職也皆擇其
道行高者限三年爲一任任滿則又別擇

人張官府設人從僧尼有訟者皆理而決
遣之並服紫袈裟都綱則列郡僧職也亦
以三年爲任有師號者賜紫無者如常僧
服維那縣僧職也僧尼有訟者答以下決
遣之杖以上者並申解僧錄都綱司

道教

金國崇重道教與釋教同自奄有中州之
後燕南燕北皆有之所設道職于師府置

司正曰道錄副曰道正擇其法錄精專者授之以三年爲任任滿則別擇其人其後熙宗又置道階凡六等有侍宸授經之類諸大貴人奉一齋施動獲千緡道教之傳有自來矣

科條

金國之法極嚴殺人剽劫者脗其腦而致之死藉其家爲奴婢親戚欲得者以牛馬

財物贖之其贓以十分爲率六歸主四沒官罪輕者決柳條罪重者贖以物貸命則割耳鼻以誌之其獄掘地數丈置囚于其中罪無輕重悉笞背州縣官各許專決當其有國之初刑法竝依遼制常刑之外又有一物曰沙袋以革爲囊實以沙石繫于杖頭人有罪者持以決其背大率似春杖之屬惟數多焉自熙宗立始加損益首除

沙袋之制至皇統間又下學士院令討論條例頒行天下目之曰皇統新制近千餘條海陵熙宗立又去春杖以其近人心故也斬刑者與上古之制一也處死者免決重杖止令給給絞也流者不流犯人家屬徒者非謂杖春代徒實拘役也徒止五年五年以上卽死罪也徒五年則決杖二百四年百八十三年百六十二年百四十

一年百二十杖無大小止以判決贖實數也拘役之處逐州有之曰都作院所徒之人或使之磨甲或使之土工無所不可脚腕以鐵爲鐐鑰鎖之罪輕者用一罪重者二之朝縱暮收年限滿日則逐便不得依舊爲百姓刑法與舊不相遠惟僧尼犯姦者強盜不論得財與不得財者並處死強姦者罪死則與古法異

赦宥

金國以赦宥最爲大事或改元或生子或冊封或遷都或災異竝皆肆赦罪無減等一例放之每赦必有恩內外小大文武百官竝與覃遷一資熙宗臨季年一歲兩赦海陵立常謂赦宥非國家常典若惠姦宄則賊良民詔告天下自今以往更不議赦不兩年躬自蹈之其後復有改正隆赦迨

世宗立纔數年間已降三赦然洪忠宣松漠記聞云北朝惜赦無郊霈余銜命十五年才見兩赦一爲舍都姑叛一爲皇子生豈是時天會年間惜赦而此後不惜赦邪

屯田

屯田之制本出上古金國行之比上古之制尤簡廢齊國後慮中州有懷王三戶之意始置屯田軍非止女真契丹亦有之自

本部族徙居中土與百姓雜處計其戶口
給賜官田使自播種以充口食春秋量給
衣服若遇出軍之始月給錢米米不過十
斗錢不過數千老幼在家依舊耕耨亦無
不足之歎今屯田去處大名府山東河北
兩關諸路皆有之約一百三十餘千戶每
千戶止三四百人所居止處皆不在州縣
築寨處村落間千戶百戶雖設官府亦在

其內

田獵

金國酷喜田獵昔會寧四時皆獵海陵遷
燕以都城外皆民田三時無地可獵候冬
月一出必踰月后妃親王近臣皆附焉每
獵則以隨駕軍密布四圍名曰圍場待狐
兔猪獐麋鹿散走于圍中國主必先射之
或以鷹隼擊之次及親王近臣出圍者許

諸餘人捕之飲隨處而進或以親王近臣
共食遇夜或宿於州縣或宿於郊野無定
海陵以其子光漢年十二獲獐取而告太
廟熙宗尤甚有三事令臣下不諫曰作樂
曰飯僧曰圍場其重田獵如此

兵制

金國凡用師征伐上自大元帥中自萬戶
下至百戶飲酒會食略不間列與父子兄

弟等所以上下情通無閉塞之患國有大
事通野環坐畫灰而議自卑者始議畢卽
漫滅之不聞人聲軍將行大會而飲使人
獻策主帥聽而擇焉其合者卽爲特將任
其事暨師還戰勝又大會問有功者隨功
高下多少支賞舉以示衆薄則增之

旗幟

金國以水德王用師行征旗皆尚黑雖五

色皆具必以黑為主尋常車出入止用一日旗與后同乘則加月旗二相間而陳或數百隊或千餘隊日旗卽以紅綃爲日刺於黃旗上月旗卽以素帛爲月刺於紅旗上近御則又有日月大繡旗二如大禮祫享冊封一循古制旗無大小皆循焉然五方五星五嶽青龍白虎朱雀玄武神鳳外又有五星聯珠一日月合璧一象二天王

二海馬二鷹準二太白三近御又張一大旗其制極廣錯綜神物以猛士執之傍有數十人護之各施大繩以備風勢名之曰蓋天

車繖

后妃竝用殿車其車如五花樓之狀上以錦繡青氊爲蓋四圍以簾秋冬亦用氊竝用金飾綠柱廊月板護泥皆飾以金玉或

四輪或兩輪並朱車之四角后用金鳳妃
用金孔雀如一品二品車之四角夫人並
用銀螭頭

國王繖或紅或黃無定以金龍爲頂蓋后
用金鳳太子用金龍妃紫繖用孔雀一品
青繖用銀浮圖二品三品用紅浮圖四品
五品青浮圖

服色

論服色各以官品如五品官便可服五品
服如武臣至四品皆腰橫金若文臣則加
魚不待錫賜而皆許自服焉

國主視朝服纁紗幘頭窄袖赭袍玉帶黃
滿領如遇祭祀冊封告廟則加衮冕法服
平居閒暇阜巾雜服與士庶無別

宇文懋昭撰

金志終



卷之三